

DOMINGU XXXII TEMPU KOMÚN – TINAN A

Tema

Liturjia Domingu XXXII Tempu Komún nian konvida ita ba vijilánsia. Liturjia fó hanoin atu ita matan moris nafatin ba Na’i ne’ebé mai hikas no prepara fuan atu simu Nia.

Iha *leitura daruak*, Paulo garante sarani sira Tessalónica nian katak Kristu sei mai fali atu taka istória umana no inaugura realidade mundu definitivu; ema hotu ne’ebé adere ba Jezús no identifika an ho Nia sei bá hasoru Na’i no horik ho Nia ba nafatin.

Evanjellu fó hanoin katak “prepara an” atu simu Na’i ne’ebé mai signifika moris iha fidelidade ba Jezús nia hanorin sira no kompromete an ba valór sira Reino nian, loran ba loran. Ho exemplu feto virjen “beik-teen” na’in lima ne’ebé la lori mina atu mantein ahi-oan lakan enkuantu hein noivu, fó atensaun mai ita katak valór *Evanjellu* nian de’it mak asegura partisipasaun iha festa Reino nian.

Leitura dahuluk apresenta mai ita “sabedouria”, don gratuito no inkondisionál Maromak nian ba ema. Ne’e mak kazu paradigmátiku ida kona-ba oinsá Maromak preokupa ho ema nia ksolok no tau ba nia oan sira nia dispozisaun bee-matan ne’ebé hasuli vida definitiva. Ema presiza de’it matan moris, vijilante no disponivel atu simu, iha momentu hotu, moris no salvasaun ne’ebé Maromak oferece.

LEITURA I – Sab 6,12-16

“Livrú Sabedouria” nian mak livru resente liu Testamento Tuan nian (primeira metade sék. I mK). Autór mak judeu ida Diáspora nian (Alexandria?) – halo eloju ba “sabedouria” israelita, no fó sai sorte ne’ebé sei kona ema justu no ema aat no hodi foti exemplu husi istória Ézodu nian hatudu sorte ne’ebé ema Ejitu hetan (idólatra sira) no ebreu sira nia sorte (fiél ba Jahwéh). Nia iha objetivu rua: hodi dirije ba maluk judeu sira (iha mundu paganizmu, idolatria no imoralidade nian), nia konvida sira atu deskobre fali bei-ala sira nia fier no valór judaiku sira; dirije ba pagaun sira, nia konvida atu kontra idolatria no adere ba Jahwéh, Maromak loos no mesak... Ba sira hotu, nia hateten katak, Jahwéh de’it mak garante “sabedouria” loos, ksolok loos.

Testu ohin nian pertense ba parte daruak livru nian (kf. Sab 6,1-9,18). Autór tau iha liurai Salomão nia ibun (maski iha livru la temi liurai nia naran ho modu esplísitu) “eloju sabedouria” nian. Hodi dirije ba liurai sira seluk, Salomão konvide atu simu “sabedouria” (kf. Sab 6,11), basá nia furak, labele troka no garante imortalidade no ukun rohan-laek.

Sabedouria ida-ne’ebé loos mak refere iha-ne’e? “Sabedouria” mak arte moris di’ak, arte sai haksolok. Livru fó konjuntu ida prinsípiu prátku sira-nian, norma komportamentu nian ne’ebé dedús husi reflesaun no esperiênsia, atu tulun ema oinsá hala’o nia moris loroloron. Objetivu norma sira-nian mak mak halo ema moris iha armonia, ekilíbriu, orden no ho ézitu nakonu.

Reflesaun israelita identifika “sabedouria” ho Torah (Maromak nia Lei). Sai “matenek” mak – ba reflesaun judaika iha époka ne’ebé “Livrú Sabedouria” nian mosu – kumpre ho modu integrál ukun-fuan sira Lei nian. Iha “sabedouria”/Torah, ne’ebé Jahwéh revela, ema hetan dalan atu hetan susesu/ézitu, atu manán obstáculo sira ne’ebé moris lori no atu sai haksolok.

Iha kontestu ida-ne’e mak ita tenke komprende konvite ba “sabedouria”.

MENSAJEN

“Sabedouria” la’ós, tuir autór testu nian, buat ruma misteriozu, haksumik an, ne’ebé difisil ba ema atu hetan... Nia nabilan ho roman ne’ebé maka’as no atraente, no kapta ema ne’ebé buka ninia hateke. La presiza halai tuir nia, ho kuidadu no kolen, halo dalan difisil ka buka nia iha fatin nakukun sira... Natón de’it atu iha interese ba nia, hadomi nia, hakarak nia, no nia halo nia an prezente kedes. Ema ne’ebé hadomi “sabedoria” fasil atu “sidi” ih ania, iha sirkunstánsia komún sira moris loroloron nian: iha odamatan oin, iha lurón sira to’o iha hanoin íntimu sira... Atu sabedouria bele leno em ania moris, presiza de’it disponibilidade atu simu nia.

LEITURA II – 1 Tes 4,13-18

Tuir “Apóstolu sira nia Hahalok”, Paulo la iha tempu barak atu evanjeliza ema Tessalónika sira. Depoizde semana rumा pregasau nian, judeu sira obriga nia sai lalais husi Tessalónika, hodi husik hela komunidade sarani ida ne’ebé laran-manas no iha entuziazmu, maibé ladún preparada husi pontudevista katekétiku (kf. Apóst 17,1-10). Paulo bá Bereia, depois Atenas no Korinto. Husi Korinto, Paulo haruka Timóteo bá hasoru sarani Tessálonica nian, atu verifika oinsá komunidade auguenta judeu sira nia ostilidade. Fila ba Corinto, Timóteo haktuir ba Paulo komunidade nia situasaun: sarani Tessalónika nian kontinua moris ho entuziazmu sira nia fier, maski balun duvida kona-ba kestauns sira fier no doutrina nian.

Problema teolójiku ida ne’ebé preokupa sira mak kestaun parusia nian (Jezús nia fila-hikas, iha tempu nia rohan)... Paulo no jerasaun sarani dahuluk fier katak sei mosu lalais iha tempu badak no sira sei asiste Jezús nia trunfu ikus. Nune’e, sira tua kestaun práktiku: sá loos destinu ba sarani sira ne’ebé mate ona molok Kristu fila-hikas? Oinsá sira sei bá hasoru Kristu ne’ebé manán no tama iha Maromak nia Reinu ho Nia se sira mate ona?

Nune’e mak Paulo hakerek ba sarani Tessalónika nian, enkoraja sira iha fier no hatán ba sira nia dúvida sira. Ita iha tinan 50 ka 51. Testu ne’ebé propoin mai ita halo parte Paulo nia esklaersimentu ne’ebé nia inklui iha surat.

MENSAJEN

Uluknanai Paulo konfirma buat ne’ebé nia hanorin ona ba sarani sira Tessalónika nian: Kristu sei mai fali atu konklui istória umana; no ema hotu ne’ebé adere ba Kristu, identifika an ho Nia, mate ka moris, sei hetan salvasaun (vers. 14). Se Kristu simu moris rohan-laek husi Aman, ema ne’ebé identifika an ho Kristu sei iha moris hanesan; mate la iha kbiit hasoru Nia... Ida-ne’e tenke hakonu ema sarani nia esperansa, hodi mantein nia haksolok, hakmatek no nakonu ho korajen.

Oinsá ne’e akontese, Paulo la hatudu ho modu esplísitu, tanba nia konxiente katak ne’e realidade misterioza ida, la tuir ema nia lójika no linguajen umana. Maibé nia uza jéneru literáriu “apokalipse” nian ho ilas no símbolu atu esplika ema nia pasajen husi ema tuan ba ema foun. Paulo haktuir nune’e: fier-na;in sira ne’ebé mate ona, sei moris-hi’as uluk (rona “arkanju nia lian”, “ho Maromak nia trombeta nia lian” – element típiku sira eskatolojia judaika nian); depois, “ema sira ne’ebé moris”, bá hasoru Na’i ne’ebé mai iha ninia glória no horik ho Nia ba nafatin.

Buat ne’ebé importante iha-ne’e la’ós define kuadru fotográfiku Na’i nia fila-hikas ikus nian... Buat ne’ebé Paulo hakarak halao mak sarani sira Tessalónika nian moris hakmatek, hodi asegura sira katak sei la iha díferesna ka diskriminasaun entre sira ne’ebé mate ona

molok Na'i nia mai no sira ne'ebé sei moris: sira hotu sei hasoru malu ho Na'i Jezús, hodi partilla ninia triunfu no sei tama ho Nia iha ninia glória.

EVANJELLU – Mt 25,1-13

Iha kapítulu 24 no 25 ninia Evanjellu nian, Mateus apresenta Jezús nia diskursu dalimak no ikus. Nia haluan no reelabora Marcos nia “diskursu eskatolójiku” (kf. Mc 13) hodi tau ai-knanoik tolu no deskrisaun kona-ba juízu finál.

Se iha Marcos, “diskursu eskatolójiku” refere, espesialmente, ba sinál sira molok Templa Jerusalém nia destruisaun, iha Mateus, nia aborda liuliu tema Jezús nia fila-hikas ba dala rua no atitude sira ne'ebé dixípulu sira tenke prepara ba vinda ne'e. Mudansa pers[etiv anian ne'e tuir nesesidade sira Mateus nia komunidade nian...

Liutiha ona sékulu I (dékada 80)... “Laran-manas eskatolójika” liu tiha ona no sarani sira la hein ona Jezús ninia fila-hikas. Tempu entuziazmu liu ona, sarani sira nia fier sai malirin no komunidade estabelese iha komoduzmu, iha rotina, iha facilidade... Presiza fanun fali ba kompromisu foun ho Evanjellu.

Iha kontestu ne'e, Mateus deskobre katak Jezús nia liafuan sira iha “diskursu eskatolójiku” iha nia laran iha interpelasaun maka'as; entaun, ho liafuan sira-ne'e, nia kompoim ezortasaun ida dirije ba sarani sira. Fundamentalmente, nia fó hanoin ba sira ktak Jezús ni fila-hikas tama iha orizonte finál istória humana nian; no sarani sira simu bolun atu moris ho koerénsia no entuziazmu sira-nia fier, fiél ba Jezús nia hanorin sira no ho knaar atu hari'I Reinu, enkuantu seidauk realiza vinda ne'e. Katekeze primitive fó hanoin atu “matan moris neon-na'in, atu hein Na'i ne'ebé mai”.

Ai-knanoik ohin nian refere ba ritu kazamentu judaiku sira. Tuir kostume sira, serimónia kazamentu hahú ho noivu nia prosisaun ba noiva nia uma, atu lori noiva ba ninia uma foun. Normalmente, noivu to'o atrazadu, tanba molok ne'e, nia tenek diskute ho noiva ninia familiár sira, prezente ne'ebé nia sei oferese ba ninia doben nia família. Negosiasaun entre parte rua ne'e demora no iha funsaun sosiál importante... Noiva nia parente sira tenke hatudu eijente, hodi hatudu katak família lakon buat folin boot liu bainhira entrega sira-nia oan-feto ba família seluk; husi parte seluk, noivu no ninia familiár sira kontente ho eijénsia sira, tanba nune'e, viziñu no ema sira hatene feto ne'ebé sei tama iha sira-nia família, ninia valór ninia importânsia. Sira ne'ebé fó sasin kona-ba akordu ne'e, prontu ba aviza ba noiva katak negosiasaun remata no noivu atu to'o daudaun.... Iha momentu ne'e, noiva ahtais tuir lisan, hein iha nia aman nia uma atu noivu mai hasoru nia. Noiva nia belun feto sira hein mós, ho lámpada lakan, atu akompaña noiva, entre dansa no knananuk sira, ba noiva nia uma foun. Iha-ne'ebá mak sei realiza festa kazamentu nian. Ne'e mak “background ai-knanoik ne'e nian.

MENSAJEN

Jezús nia “ai-knanoik feto virjen na'in sanulu”, mak ai-knanoik Reinu nian (vers. 1: “Reinu lalehan hanesan ho...”). Iha-ne'e, Maromak nia Reinu kompara ho selebrasauksolok no festiva liu ema Israel nian: festa kazamentu. Feto-raan na'in sanulu, reprezenta Maromak nia povu nia totalidade, ne'ebé ehin ho ansi Mesias ne'ebé sei mai (noivu)... Parte ida husi Povu (feto-raan previdente sira) preparada no, bainhira finalmente mesias to'o, sira bele tama atu halo parte ba komunidade Reinu nian; parte seluk (feto-raan deskidada sira) la preparada no labele tama iha komunidade Reinu nian.

Ai-knanoik orijinal mak apelu ida ba israelita sira atu keta lakon oportunidade atu partisipa iha festa boot Reinu nian.

Liutiha tinan barak, Mateus foti fali ai-knanoik hanesan, hodi adapta ba komunidade nia nesesidade sira. Ai-knanoik sai ezortasuan ida atu prepara an ba Na'i nia vinda, ne'ebé bele mosu iha momentu ema la hein. Festa iha kontestu ne'e mak Jezús nia vinda daruak. Noivu ne'ebé atu mai mak Jezús. Feto-raan na'in sanulu reprezenta Kreda ne'ebé, tan koko difikuldade no persegisau sira istória nian, hein maka'as libertasaun definitiva. Parte ida Kreda nian (feto-raan previdente sira) preparada, vijilante, atenta no, bainhira "noivu" to'o, bele tama iha festa han-hemu moris rohan-laek nian; parte seluk (feto-raan deskuidada sira) la preparada, tanba sira moris liu ba valór mundu nian no haluha valór sira Reinu nian.

Ba Mateus, prepara an ba Na'i ne'ebé mai katak rona Jezús nia liafuan sira, simu iha fuan no moris ho forma koerente valór sira Evanjellu nian... "Prepara an" signifika, fundamentalmente, moris iha fidelidade Aman nia projetu sira no hadomi maun nno biin-alin sira to'o saran an rasik, iha momentu hotu ita-nia ezisténsia nian.

Mensajen ne'ebé Mateus pretende tranzmite ho ai-knanoik ne'e ba sarani sira ninia komunidade nian (no ohin) mak ida-ne'e: ita sarani sira, labele dukur no hamenus ita-nia vijilánsia no halo sai fraku ita-nia empeñu ho valór sira Reinu nian. Ho tempu ne'ebé la'o ba oin, ita-nia komunidade sira iha tendénsia atu instala an iha komodizmu, iha deskuidu, iha moris fiar lahó empeñu. Iha religiaun fasil, iha falta sasin no la koerente... Presiza hafoun itania kompromisu loroloron. Serteza kona-ba Na'i nia mai tenke dudu ita ba empeñu ativu ho valór sira Evanjellu nian, iha fidelidade ba Jezús nia hanorin sira no kompromisu ho Reinu.